

Timersorneq pillugu inatsimmi lu e-sport timi atorlugu timersuutitut allatuulli akuerisaanissaa pillugu Naalakkersuisut inatsimmut allannguutissatut siunnersuuteqaqqullugit peqquneqarnissaannik Inatsisartut aalajangiiffissaattut siunnersuut.

(Inatsisartunut ilaasortaq, Aqqalu C Jerimiassen, Atassut)

Akissuteqaat

(Ilinniartitaanermut, Kultureqarnermut Ilageeqarnermullu Naalakkersuisoq)

Siullermeerneqarnera

Naalakkersuisut Aqqalu C. Jerimiassenip, Atassut, Inatsisartut aalajangiiffigisassaattut siunnersuuteqarneranut qujaniarput.

E-sportip Timersorneq timigissarnerlu pillugit Inatsisartut inatsisaannut nr. 15, 6. juni 2016-imeersumut (Timersornermut inatsit) ilaanngitsutut isigineqarmat ilumoorpoq. Tamanna aalajangersagaavoq timersornermut inatsimmi § 2, imm. 1-imi tassa timersorneq timigissarniarluni aamma peqqissarniarluni timi atorlugu sammisaqarneq. E-sportip taamatut timimik aalatitsinermik imaqqanngitsutut nalilerneqarpoq.

Taamaammallu e-sport timersornermut inatsimmut ilaalissappat inatsimmi timersornerup nassuiarneqarnerata allanngortinnissaa pisariaqassaaq. Tamanna Timersorneq pillugu inatsimmut killiliinermut apeqqusiinermik pilersitsisinnaavoq massakkullu inatsisip atuuffiinik annertunerusumik pilersitsilluni.

E-sport nunarsuaq tamakkerlugu sukkasuumik ineriartorpoq, aamma nunatsinni. Sammisaaq nutaaq, pingaartumik inuusunnerusut akornanni aallutarineqalersoq, tapersersortariaqartoq Naalakkersuisut siunnersuuteqartoq isumaqatigaat.

E-sport uatsinnut nunarsuullu sinneranut nutaarluinnaavoq. Taamaattumillu e-sportimik aallutaqartut qanoq aqqissuuseriaaseqarnerisut, e-sportimik aallutaqartunut taakkualu silarsuaannut qanoq sunniuteqartarnerisut qanorlu e-sportip siunissami sunnissaneraatigut ilisimasaqarfigivallaanngilarput. Nunalli allat sammisamat tassunga qanoq qisuariarsimanersut qiviarsinnaavarput.

Esport Danmark Danmarkimi e-sportertartut pisortatigoortumik kattuffigivaat 2007-imi pilersinneqartoq, kingornalu International E-sports Forbundimik pilersitseqataasoq. Esport Danmarkip pilersinneraniit ukiut qulit qaangiutereersut Danmarkimi Folketingi e-sportip siuarsarneqarnissaanut aningaasanik immikkoortitsisimavoq, ilaatigut e-sportimik unamminerit ingerlattarnissaannut. Taamaakkaluartoq Danmarks Idrætsforbundip e-sport timersuutitut akuerisimangilaa. Danmarks Idrætsforbund paarlattuanik suliniutit anguniagaqarfiusut aqqutigalugit e-sportip timersornerullu akornanni piukkunnaatit suleqatigiiffiusinnaasullu

pilersinnaasut, taakkualu qanoq imminnut pitsaasumik ineriartortitsiffiusinnaanerat pillugit ilisimatusartoqarnissaanik kissaateqarsimavoq. Tamanna nunatsinni timersornerup e-sportillu akornanni assingusumik suleqatigiittoqarnissaanut isumassarsior-nissamik pilersitsisinnaavoq.

E-sportip ilanngunniarnissaani timersortartut kattuffi-inik aamma e-sportimik aallutaqartut aallartitaannik peqateqarluni eqqartuilluarneq tunngavigalugu siunertaqarluni timersornermut inatsisip allanngortissinnaanissaa tullu-artuussasoq Naalakkersuisut nalilerpaat. Tassani aamma nunani allani e-sportimut tunngatillugu misilittakkat nalilersorneqarsinnaassapput. Tassungalu atatillugu e-sportip timersornermut ilaasutut akuerinngikkaluarlugu timersornermut sutigut qanorlu iliornikkut ilaalersinnaanera oqallisigineqarsinnaassaaq. Taamaammatt Naalakkersuisut taamatut oqaloqatigiittoqarnissaanik aallartitsiniarput.

Naalakkersuisut peqatigitillugu erseqqissarniarpaat malittarisassat atuuttut malillugit tapiissuteqarnissaaq aamma periarfissaassammatt, naak e-sport timersuutitut akuerineqarsimanngikkaluartoq. Tassunga atatillugu Aningaasanoorutit ilaannit aningaasanik agguaassisarneq pillugu tapeeriaatsit, tapiiffigineqarnissamut piumasaqaatit il.il. pillugit Namminersorlutik Oqartussat nalunaarutaat nr. 16, 11. maj 2020-meersoq innersuussutigineqassaaq. Malittarisassat taakku malillugit suliniuteqarnermut ingerlatsinermullu tapiissuteqartoqarsinnaassaaq. Ingerlatsinermullu tapiissutit nuna tamakkerlugu peqatigiiffinnut kattuffinnullu taamaallaat tunniunneqarsinnaapput. E-sportimillu aallutaqartut ingerlatsinermut tapiiffigineqarniarunik kattuttariaqarput.

Tamatuma saniatigut e-sportimik aallutaqartut siunissami suleqatigiinnissaaq pillugu Kalaallit Nunaanni Timersoqatigiit Kattuffiannik oqaloqateqarnissaaq Naalakkersuisut kajumissaarutigissavaat.

Taamatut Naalakkersuisut oqaaseqarlutik siunnersuutip itigartitsissutigineqarnissaa inassutigaaq.